



Čeka se odluka Tužilaštva BiH u predmetu Bosnalijek

Sedmero osumnjičenih ispitano je u SIPA, nakon čega su Uzunović i još jedna osoba predati Tužilaštvu BiH, dok su ostali pušteni na slobodu

Direktor kompanije Bosnalijek Nedim Uzunović, kojeg su prekjucher uhapsili pripadnici SIPA, nakon što je ispitano u ovoj agenciji, predat je u nadležnost Tužilaštva BiH. Skupa s njim uhapšena je još jedna osoba i očekuje se da bi Tužilaštvo BiH danas trebalo donijeti odluku o tome hoće li zatražiti pritvor ili će osumnjičeni dvojac biti pušteni na slobodu.

Uručeni pozivi

Boris Grubešić, portparol Tužilaštva BiH, kratko je rekao za Oslobođenje da, kada je riječ o predmetu Bosnalijek, još traju aktivnosti te da će danas iz Tužilaštva dati detaljnije informacije. Podsjetimo, u akciji Trik, koju su prekjucher u Sarajevu i Konjicu izveli pripadnici SIPA, uhapšene su dvije osobe, dok su uručeni pozivi za još pet osumnjičenih lica koja su ispitana i puštena na slobodu. Tere se za organizovani kriminal, zloupotrebu položaja ili ovlaštenja i pranje novca. U Tužilaštvu BiH navode da je stečena nezakonita imovinska korist u višemilionskom iznosu. Nezvanično, riječ je spornoj privatizaciji Bosnalijeka ruskim kapitalom preko offshore kompanija.

Svi osumnjičeni ispitani su u prostorijama SIPA. U pitanju je sedam osoba i kao što je već poznato, nakon pretresa, dvije osobe su lišene slobode. Ostalih pet je pozvano da se jave u prostorije SIPA, kako bi bile saslušane. Svi su se odazvali pozivu i ispitani su u prisustvu njihovih advokata, nakon čega su pušteni. Dvije uhapšene osobe predate su u nadležnost Tužilaštva BiH, kaže za Oslobođenje Jelena Miović, portparol SIPA.

Pripadnici SIPA izvršili su pretrese stambenih objekata fizičkih lica na četiri lokacije, kao i pretrese poslovnih objekata pravnih lica na pet lokacija u Sarajevu i Konjicu.

Pripadnici SIPA postupali su po naredbama Tužilaštva BiH koje su podrazumijevale izuzimanje određene dokumentacije, koja može poslužiti kao dokaz u vođenju krivičnog postupka. U interesu istrage, u ovoj fazi ne možemo otkrivati imena pet osoba koje su saslušane i puštene na slobodu, dodaje Miović.

Reakcija iz Sindikata

Jučer su se oglasili i iz Sindikalne organizacije Bosnalijeka u vezi sa istražnim radnjama. U saopštenju za medije navode da daju podršku ispitivanju eventualnih nepravilnosti te da je primarni interes briga o sigurnosti radnih mjesta uposlenika kompanije.

Radnici Bosnalijeka ne smiju biti žrtve bilo kojih istražnih radnji. Mi u Sindikatu smatramo da je Bosnalijek u uslovima pandemije, koja još uvijek vlada, od posebnog strateškog interesa za sve građane BiH. To se naročito potvrdilo prilikom prošlogodišnje blokade granica i zabrane izvoza lijekova iz brojnih svjetskih država, kada smo mi, radnici Bosnalijeka, radeći bez bilo kakvih prekida, osigurali uredno snabdijevanje domaćeg tržišta svim esencijalnim lijekovima i dezinfekcionim sredstvima koje proizvodimo, poručili su.

AMELA LONČARIĆ

Nakon saslušanja u Tužilaštvu BiH na slobodu je pušten Sead Uzunović, otac direktora Bosnalijeka Nedima Uzunovića

Tokom pretresa u Sarajevu i Konjicu pripadnici SIPA izuzeli su određenu dokumentaciju



Pripadnici SIPA pretresli su i Uzunovićevu kuću